

me donnoit peu de relasche ie n'y prins point garde, ny a beaucoup d'autres choses qu'en autre faison i'eusse curieusement obseruées.

119 Ce poisson n'estoit point trop à mon goust à cause de mon degoust, mais beaucoup moins la discourtoisie d'un chirurgien huguenot qui seul auoit le soin de nous assister, car nous n'en pouuions tirer une seule bonne parole, non pas mesme ceux de sa pretendüë religion, qui ne pouuoient approuuer sa mauuaise dereglée & melancolique humeur, qui domine || d'ordinaire en ceux qui ont l'ame assise en mauuais lieu.

Passant deuant la Rochelle on renuoya le nouveau Pilote qui nous auoit ramené de Broüages, on remplit nos barriques d'eau douce dans l'isle de Rez, puis ayant mis les voiles au vent, & le cap à la route de Canada, nous cinglames par la Manche en haute mer à la garde du bon Dieu & à la mercy des vents, qui nous furent fauorables & discourtois selon leur inconstance.

Des larrons & pirates.—D'un Matelot tué par accident.—Tourmente fort grande.—Prise d'un Nauire Anglois.—Des Baleines & du poisson appelé Dorade beau par excellence.

CHAPITRE II.

On se plaint, mais avec raison du grand nombre de voleurs & delarronneaux, qu'en guise de chenilles cou-